

Parke Nacional Arikok ta continua su di dos aña di monitoria raton di anochi



ORANJESTAD- Di dia 11 te cu dia 15 di maart 2013 Parke Arikok a guia su prome seccion di e di dos aña di monitoria raton di anochi. Durante e ultimo sesion aki tambe Parke por a disfruta di e tremendo aporte di boluntarionan local y internacional cu a bin sostene e team di Parke. Parke ta sumamente contento cu e continuacion di su proyecto y cu e aporte y tremendo y interes di comunidad di Aruba

Algun resultado di e ultimo sesion:

Manera conoci team di Parke ta monitoria na cuater diferente sitio den Parke cu ta: Wela, Miralamar, Guadirikiri, y Baranca Sunu (Tunnel of Love). Durante e ultimo sesion e team di Parke por a nota cu na Wela algun raton di anochi di e especie *Glossophaga longirostris* (Long-tongued bat) tabata na estado. Tambe e team di Parke por a nota cu e cantidad di raton di anochi procesa (na tur sitio) tabata significativamente menos cu e aña anterior. E motibo dicon e cantidad di raton di anochi no ta mescos cu e aña anterior no ta completamente cla pa e team.

Pa e motibo aki Parke ta den consulta cu expertonan di Venezuela y Boneiro. Algun pensamiento ta cu kisas ta trata di algo natural, pero tambe por tin di haber cu perdida di habitat of e poco cuminda cu ta disponibel.

Un otro pensamiento ta cu e ratonan di anochi ta wordo stroba door di algun bishitante di Parke cu ta bin despues di orario cu Parke cera y cu lamentablemente ta stroba e raton di anochi. Diferente persona a informa Parke cu esaki ta e caso specialmente na e cueba Guadirikiri. Esaki ta algo cu ta di lamenta door di cu principalmente na e cueba Guadiriki a pone un borchu informativo splicando e importancia di nos raton di anochi. Directiva di Parke ta den consulta pa busca un solucion pa e situacion aki y kier a gradici tur persona cu ta yuda Parke den su meta di proteccion y conservacion.

Parke y su partnership cu RELCOM

Un aspecto importante di Parke su proyecto di raton di anochi ta Parke su participacion den e red

internacional yama 'Red Latinoamericana para la Conservacion de los Murcielagos' RELCOM. E red internacional aki ta consisti di partnernan di diferente pais manera Chili, Honduras y tambe islanan manera Puerto Rico, Corsou y Boneiro. E red su meta principal ta proteccion di e raton di anochi y tambe crea conscientisacion door di educa hobennan y comunidad.

Un manera cu RELCOM ta purba educa hobennan di e importancia di raton di anochi ta e Murcimaleta. E murcimaleta ta un intercambio entre diferente pais unda cu tur pais ta aporta (pa medio di potret y texto) cu nan esfuersonan pa crea conscientisacion. Parke ta sumamente contento di por informa pueblo henter cu Aruba tambe ta representa den e programa di intercambio aki. Asina diferente pais ta cera conoci cu Aruba y esfuerso pa protege su raton di anochinan. Un danki grandi ta bay na comunidad nacional y internacional di Aruba pa nan sosten durante e proyecto y ta pidi un y tur pa keda pendiente pa mas informacion! □